



SLUŽBA ZA REVIZIJU FINANSIJSKOG POSLOVANJA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u skladu sa članom 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08) izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2007. GODINU **HRVATSKE DEMOKRATSKE ZAJEDNICE BIH**

Broj: 03-07-6-858/08
Sarajevo, 14. 01.2009. godine

SADRŽAJ:

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE	7

MIŠLJENJE REVIZORA

Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je pregled godišnjeg finansijskog izvještaja **Hrvatske demokratske zajednice Bosne i Hercegovine** za 2007. godinu.

Rukovodstvo stranke je odgovorno za finansijske izvještaje, postupanje u skladu sa Zakonom o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

Hrvatska demokratska zajednica Bosne i Hercegovine je prekršila odredbe člana 6., člana 8. stav (1) i člana 11. stav (3) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornjih napomena nismo zapazili ništa značajno što bi ukazalo na druge nedostatke u izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansijskog poslovanja u Centralnoj izbornoj komisiji BiH (u daljem tekstu: Služba za reviziju) je izvršila pregled godišnjeg finansijskog izvještaja Hrvatske demokratske zajednice Bosne i Hercegovine za 2007. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08).

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska demokratska zajednica Bosne i Hercegovine je iskazala prihode u iznosu od 1.389.145,05 KM, čija struktura je data u sljedećoj tabeli¹:

Red.br.	Vrsta prihoda	Iznos u KM	Učešće u ukupnom prihodu %
1	Članarina	76.768,09	5,53 %
2	Prilozi fizičkih lica	16.040,00	1,15 %
3	Prilozi pravnih lica	6.626,24	0,48 %
4	Prihodi od imovine	7.881,53	0,57%
5	Prihodi od pr.lica	0,00	0,00%
6	Prihodi od poklona	0,00	0,00 %
7	Prihodi iz budžeta	1.281.829,19	92,27 %
	Ukupni prihodi:	1.389.145,05	100,00%

U godišnjem finansijskom izvještaju Bosansko Podrinjska narodna stranka je iskazala ukupne rashode u iznosu od 1.446.452,33 KM.

2. PREDSTAVLJANJE POLITIČKE STRANKE

Naziv političke stranke: Hrvatska demokratska zajednica Bosne i Hercegovine. Skraćeni naziv stranke je HDZ BiH.

Hrvatska demokratska zajednica BiH osnovana je 1990. godine.

Posljednja registracija: 03.09.2001. godine u Kantonalnom sudu u Mostaru, pod brojem 01/2001.

Sjedište političke stranke je u Mostaru, ulica Kneza Domagoja bb.

Za zastupanje stranke u 2007. godini bio je ovlašten Dragan Čović, predsjednik stranke.

Lice ovlašteno za podnošenje finansijskih izvještaja za 2007. godinu je Marica Jurić.

¹ Podaci koji su iskazani u tabeli preuzeti su iz ispravljenog godišnjeg finansijskog izvještaja Hrvatske demokratske zajednice BiH za 2007. godinu koji je Centralnoj izbornoj komisiji BiH dostavljen 29.09.2008. godine.

Organizacionu strukturu HDZ BiH čine:

- Središnjica HDZ BiH Mostar
- 9 kantonalnih odbora
- jedan gradski odbor
- 49 općinskih odbora

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatske demokratske zajednice Bosne i Hercegovine za 2007. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je Hrvatska demokratska zajednica Bosne i Hercegovine u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti reviziju u prostorijama političke stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka

Obim pregleda i kontrole finansijskih izvještaja Hrvatske demokratske zajednice Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica i prihode iz budžeta.

4. PRETHODNE KONTROLE I REVIZIJE

Izvršena je revizija godišnjeg finansijskog izvještaja za 2004. godinu, pregled godišnjeg finansijskog izvještaja za 2005. godinu i revizija godišnjeg finansijskog izvještaja za 2006. godinu. Izdati su izvještaji o reviziji i izvještaj o pregledu sa mišljenjem revizora, nalazima i preporukom revizije.

Realizovane preporuke:

Hrvatska demokratska zajednica BiH je djelimično ispoštovala preporuke revizije date u izvještajima o reviziji i izvještaju o pregledu godišnjih finansijskih izvještaja.

Nerealizovane preporuke:

Na osnovu uočenih nedostataka u godišnjem finansijskom izvještaju za 2007. godinu, utvrđeno je da Hrvatska demokratska zajednica BiH nije ispoštovala sve preporuke date u izvještajima o reviziji, odnosno pregledu i da je u 2007. godini postupala suprotno odredbama člana 6. i člana 8. stav (1) i člana 11. stav (3) Zakona o finansiranju političkih stranaka.

5. NALAZI I PREPORUKE

5.1. NALAZI

a) Na osnovu pregleda godišnjeg finansijskog izvještaja utvrđeno je da HDZ BiH nije postupila u skladu sa odredbama člana 6. Zakona o finansiranju političkih stranaka.²

Stranka u finansijskom izvještaju nije iskazala priloge fizičkih i pravnih lica po osnovu korištenja poslovnih prostorija bez naknade za 12 općinskih odbora.

- Općinski odbori: OOHDZ Čitluk, OOHDZ Ljubuški, OOHDZ Posušje, OOHDZ Odžak, OOHDZ Kakanj, OOHDZ Vareš, OOHDZ Kupres, OOHDZ Jajce i OOHDZ Vitez su koristili poslovne prostore bez naknade. U izvještaju su iskazani samo režijski troškovi koji su nastali korištenjem poslovnih prostorija (troškovi električne energije, troškovi utrošene vode, troškovi fiksnog telefona i sl.), dok nisu iskazani troškovi zakupnine.
- Predsjednik Kantonalnog odbora HDZ Zapadnohercegovačkog kantona, Zdravko Bešlić i predsjednik Općinskog odbora HDZ Široki Brijeg Miro Kraljević, su dali pisane izjave da se administrativni poslovi za dva navedena organizaciona dijela stranke HDZ BiH obavljaju u njihovim domovima, za šta stranka ne plaća nikakvu naknadu.
- Općinski odbor HDZ Fojnica iako je 01. aprila 2007. godine sklopio ugovor sa Draganom Markićem o korištenju poslovnog prostora uz mjesečnu zakupninu od 200,00 KM, stranka nije plaćala zakupninu, te je ostvarila prilog od 1.800,00 KM.

b) Pregledom godišnjeg finansijskog izvještaja i dodatne finansijske dokumentacije utvrđeno je da je HDZ BiH prekršila odredbe člana 8. stav (1) Zakona o finansiranju političkih stranaka.³

Stranka je bez plaćanja zakupnine suprotno odredbama člana 8. stav (1) Zakona koristila poslovne prostore u općinskom vlasništvu i vlasništvu javnog preduzeća.

- Općinski odboru HDZ Tuzla je bez naknade koristio poslovni prostor površine 99,44 m² u vlasništvu Općine Tuzla. Stranka je po ugovoru o zakupu bila obavezna da plaća samo porez na dodatnu vrijednost u iznosu od 135,24 KM mjesečno, dok je oslobođena od plaćanja zakupnine u iznosu od 795,53 KM mjesečno. Neplaćanjem zakupnine za poslovni prostor, stranka je u 2007. godini ostvarila zabranjeni prilog od Općine Tuzla u iznosu od 9.546,36 KM
- Stranka nije iskazala zakupninu za poslovni prostor u vlasništvu JP „Elektroprivreda HZ HB“ koga je koristio Općinski odbor HDZ Prozor-Rama. Prema ugovoru koji važi za period 01.01. do 31.12.2007. godine ugovorena je cijena mjesečne zakupnina od 5,00 KM po m². U navedenu cijenu su pored zakupnine uključeni: naknada za utrošenu električnu energiju, utrošenu vodu, naknada za odvoženje smeća, naknada za čišćenje, te naknada za korištenje sale za sjednice. Prema cijeni iz ugovora, koju nije platila, stranka je ostvarila zabranjeni prilog u iznosu od 3.159,00 KM.

² Ako ukupan iznos priloga jednog pravnog ili fizičkog lica premašuje 100 KM, prilog se mora unijeti u finansijski izvještaj u skladu sa članom 11. Zakona o finansiranju političkih stranaka.

³ Državni, entitetski i kantonalni organi, organi općinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

c) **Stranka nije ispoštovala odredbe člana 11. stav (3) Zakona o finansiranju političkih stranaka jer finansijski izvještaj nije popunila u skladu sa Pravilnikom o godišnjim finansijskim izvještajima političkih stranaka.**⁴

- Stranka u finansijski izvještaj nije unijela priloge fizičkih i pravnih lica po osnovu pruženih joj usluga zakupa poslovnih prostora, koje nije imala obavezu platiti.
- U finansijskom izvještaju stranka je iskazala prihod od imovine kod OO HDZ Kakanj u iznosu od 2.521,00 KM. Navedeni općinski odbor nema poslovni prostor u svom vlasništvu, a sredstva je ostvario po osnovu refundacije zajedničkih troškova, te ona nemaju karakter prihoda od imovine stranke.

Troškovi predizborne kampanje za prijevremene izbore

Stranka je učestvovala na prijevremenim izborima za načelnika Općine Novo Sarajevo. Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM⁵ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Hrvatska demokratska zajednica BiH za finansiranje kampanje na prijevremenim izborima za načelnika Općine Novo Sarajevo mogla je potrošiti 18.897,30 KM.

U finansijskom izvještaju koji je stranka dostavila Centralnoj izbornoj komisiji BiH nisu iskazani troškovi kampanje⁶.

5.2. PREPORUKE

Hrvatskoj demokratskoj zajednici BiH se preporučuje da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da postupa u skladu sa odredbama člana 6. člana 8. stav (1) i člana 11. stav (3) Zakona o finansiranju političkih stranaka i to:*
 - *da u finansijskom izvještaju prijavljuje priloge fizičkih i pravnih lica iznad 100,00 KM bez obzira po kom osnovu ih ostvaruje*
 - *da se ne finansira priložima koji su zabranjeni ovim zakonom,*
 - *da finansijski izvještaj popunjava u skladu sa Pravilnikom o godišnjim finansijskim izvještajima političkih stranaka,*
 - *da u godišnjem finansijskom izvještaju iskazuje i podatke utvrđene Izbornim zakonom BiH*

⁴ Politička stranka je obavezna finansijski izvještaj podnijeti u formi koju odobri Centralna izborna komisija BiH. Centralna izborna komisija BiH je donijela Pravilnik o godišnjim finansijskim izvještajima političkih stranaka („Službeni glasnik BiH“ broj 61/06), kojim je propisala obrasce i način podnošenja finansijskih izvještaja.

⁵ Član 15.10 stav 2. istog člana propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

⁶ Finansijski izvještaj koji politička stranka podnosi Centralnoj izbornoj komisiji BiH do 31.03. naredne godine za predhodnu godinu, sadrži i podatke utvrđene Izbornim zakonom BiH.

Komentar

Hrvatska demokratska zajednica BiH se nije očitovala na nalaze revizije i mišljenje revizora dato u preliminarnom izvještaju o pregledu godišnjeg finansijskog izvještaja za 2007. godinu koji joj je dostavljen 12.12.2008. godine.

Mr. Hasida Gušić, Šef Službe za reviziju, revizor